

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : YB PROF. DR. ISMAIL BIN DAUT [MERBOK]
TARIKH : 7 MAC 2017
SOALAN :

YB Prof. Dr. Ismail bin Daut [Merbok] minta **MENTERI KESIHATAN** menyatakan langkah-langkah yang diambil dalam menangani masalah penularan jangkitan virus di tempat rekreasi dan pusat riadah sehingga mengundang kes kematian seperti yang terjadi di Pusat Rekreasi Bukit Merah, Air Panas Legong dan lain-lain kawasan yang terpaksa ditutup.

Tuan Yang di-Pertua,

Kementerian Kesihatan Malaysia (KKM) ingin memaklumkan jangkitan virus yang dikaitkan dengan tempat rekreasi dan pusat riadah air adalah berkemungkinan jangkitan Rotavirus iaitu jangkitan yang boleh menyebabkan cirit birit yang teruk terutamanya dikalangan kanak-kanak. Jangkitan ini biasanya menular melalui air dan makanan yang dicemari virus. Sepanjang tahun 2016 dan 2017, hanya tiga (3) kluster Rotavirus melibatkan tempat rekreasi dan pusat riadah air dan **tiada kematian** dilaporkan.

Diantara langkah-langkah yang diambil dalam menangani penularan jangkitan Rotavirus di tempat rekreasi dan pusat riadah air adalah :

- i. Meningkatkan kesedaran dan pendidikan kesihatan kepada pengunjung-pengunjung tempat rekreasi dan riadah air akan cara pencegahan jangkitan Rotavirus. Kempen-kempen kesihatan mengenai amalan kebersihan diri, persekitaran dan amalan keselamatan makanan serta edaran risalah-risalah kesihatan kepada pengunjung-pengunjung pusat rekreasi telah dijalankan. Risalah-risalah kesihatan juga boleh didapati di laman web serta media sosial KKM.
- ii. Pihak-pihak yang bertanggungjawab seperti pengusaha tempat rekreasi dan pihak yang memberi lesen perlu memastikan *Standard Operating Procedure (SOP)* keselamatan dan kesihatan di tempat tersebut dipatuhi. Tata etika penggunaan tempat mandi perlu dikuatkuasakan seperti larangan memakai lampin pakai buang di kolam mandi serta membuang sampah dan lampin di tong-tong sampah yang disediakan.

KKM juga tidak akan teragak-agak untuk mengambil tindakan penutupan terhadap tempat rekreasi dan riadah air yang disyaki menyebabkan atau menularkan jangkitan penyakit yang boleh membahayakan pengguna selaras dengan Akta Pengawalan Penyakit Berjangkit 1988.